

Fiskeri- og kystdepartementet
Postboks 8118 Dep
0032 Oslo

Dykkar ref: 200900924

Vår ref: 2010/1694

Bergen 18.01.2011

Arkivnr: 008

Løpenr: 332/2011

HØYRINGSNOTAT OM REGULERING AV DELTAKING I FISKE ETTER LANGE OG BROSME FOR FARTØY OVER 28 METER

Vi viser til høyringsnotat den 16.11.2010 om regulering av deltaking i fiske etter lange og brosme for fartøy over 28 meter.

Instituttet har i tidlegare brev til Fiskeridirektoratet (saksnr. 2009/978 og 2010/1192), med kopi til Fiskeri- og kystdepartementet, uttrykt uro for det vi meiner er ein auke av fiskeinnsatsen på ikkje-kvotebelagte kystnære bestandar som vi samtidig strevar med å gjenoppbygge, eksempelvis lange, vanlig uer og kysttorsk. Det same gjeld for fisket etter brisling og lokale sildestammar. Så lenge ein ikkje har sett kvoter på desse artane/bestandane, så er det fiskeinnsatsen/-effektiviteten som må overvakast og regulertast for å få til ei gjenoppbygging til naturleg høgare nivå og derved auka langtidsutbyte. Instituttet meiner difor at det vil vere uansvarleg og ikkje i tråd med ei føre-var tilnærming å la nye/fleire og større fartøy få lov å kome inn i kyst- og fjordfisket (utan å redusere innsatsen til andre flåtegrupper).

Eit godt eksempel på positiv bestandsutvikling etter ein reduksjon i flåten ser vi særleg for brosme og lange. Etter omstruktureringa av lineflåten i 2000 vart antal fartøy raskt meir enn halvert. I løpet av få år etter omstruktureringa byrja både CPUE (fangst per krok) og fangst per fartøy å auke, og denne utviklinga synest å fortsetje. Den positive utviklinga meiner vi er eit resultat av at fiskepresset i form av antal fartøy vart sterkt redusert. Dersom antalet båtar igjen aukar er instituttet redd for at dette vil føre til for sterkt press på bestandane, og at vi kan stå i fare for at lange igjen hamnar på raudlista.

Havforskningsinstituttet ser difor positivt på forslaget til regulering av deltakinga i fisket etter lange og brosme for fartøy over 28 meter. Instituttet har tidlegare føreslått at det ved fiske i kyst- og fjordstrøk bør tilgangen styrast etter fartøylengd og reiskapsstorleik/-mengd, og støttar difor at fartøylengd på over og under 28 meter blir eit reguleringskriterium i tillegg til samla rom-volum på maksimum 500 m³, og at gruppa for fartøy over 28 meter med rom-volum under 500 m³ blir lukka

så snart som mogeleg. Her har det allereie skjedd ein innsatsauke som vil få betydning for bestandsutviklinga.

Høyringsforslaget til regulering går imidlertid ikkje langt nok med omsyn til trongen for eit større vern av vanleg uer som sidan sist har fått ei alvorlegare klassifisering på Rødlista. ICES og Havforskningsinstituttet meiner at det ikkje bør vere direkte fiske på denne arten, og verre blir det også sidan det ikkje er noko kvotetak på det direkte fisket som får lov å føregå fritt i sju månader av året. Eit lite steg i rett retning vil difor vere å ha same regulering for blåkveite og vanleg uer for konvensjonelle fartøy over 28 meter, dvs. at desse fartøya heller ikkje kan fiske direkte etter vanleg uer.

Utover dette har instituttet ingen merknader til høyringsforslaget.

Venleg helsing



Reidar Toresen
Forskingsdirektør

For

Kjell Nedreaas
Seniorforskar



Kopi: Fiskeridirektoratet